

欽  
定  
全  
唐  
文

欽定全唐文卷二百八十四目錄

張九齡二

敕令禮部掌貢人

敕幸西京

敕置十道使

敕授十道使

敕停官祭贈太子

敕歲初處分

敕處分舉人

敕處分縣令

敕處分縣令

敕處分選人

敕議放私鑄錢

敕處分宴朔方將士

敕宴幽州老人

敕慮囚

敕擇日告廟

敕辭泰書

敕安西節度王斛斯書

敕西州都督張待賓書

敕清夷軍使虞靈章書

敕伊吾軍使張楚賓書

敕河西節度牛仙客書

敕北庭將士已下書

敕西州都督張待賓書

敕北庭將士百姓等書

敕新羅王金重熙書

敕新羅王金興光書

敕河西節度牛仙客書

敕瀚海軍使蓋嘉運書

敕安西節度王斛斯書

敕幽州節度張守珪書

敕幽州節度張守珪書

敕劍南節度王昱書

欽定全唐文卷二百八十四

張九齡二

敕令禮部掌貢人

敕每歲舉人求士之本專典其事寧不重歟頃年已來惟  
考功郎所職掌位輕事重名實不倫欲盡委長官又銓選  
猥積且六官之例體國是同況宗伯掌禮宜主賓薦自今  
已後每諸色舉人及齋郎等簡試並於禮部集既眾務煩  
雜仍委侍郎專知

敕幸西京

敕朕所時邁皆順物情頃屬關輔無年遽爾東幸固非爲  
已將以息人今百穀旣成庶務皆省而五陵所奉誠在京  
師安可更留周南有闕時薦宜以來年正月七日取南路  
幸西京所司準式應緣行幸所須務從節減所由明爲條  
例勿使勞煩

敕置十道使

敕歲比不登人或流亡言念菜色朕用疚懷而牧宰是寄  
惠養猶缺黎元爲本賦斂未均當宁思之良所於邑且十  
連爲率六察分條周漢以還事有因革帝王之制義在隨

時其天下諸道宜依舊逐要便置使令採訪處置若牧宰  
無政不能綱理吏人有犯所在侵漁及物土異宜人情不  
便差科賦稅量事取安朕所責成貴在簡要其餘常務不  
可橫干其使宜令中書門下卽簡擇奏聞朕將親覽

### 敕授十道使

敕言念蒼生心必遍於天下自古良牧福猶潤於京師所  
以歷選列城聿求連率豈徒刺察將委輯寧朝散大夫檢  
校御史中丞關內道宣慰賑給使上柱國盧絢等任寄已  
深聲實兼茂咸貫通於理道益純固於公心或華髮不衰



或白珪無玷可以範儀郡國康濟黎元間歲已來數州失稔頗致流亡能勿殷懷吏又不畏不仁人或不安不便誠須矯過必在仗賢而前此使車不無殷鑒事皆掣肘務欲總權小有舉於毫髮大莫振於綱領本不條察却用煩苛永言所期豈云自弊今旣各膺重寄允謂通才以蠲疾苦之原當叶大中之義若令行一道利及萬人朕所設官以待能者朝之優秩必歸令譽言可復也宜副朕懷可依前件

敕停官祭贈太子

敕諸贈太子頃年官爲立廟並致享祀雖欲歸厚而情且未安蒸嘗之時子孫不預若專令官祭是以疏閒親遂此爲常豈云教孝其諸贈太子有後者但官爲致廟各令子孫自主祭其祭置及官悉停若無後宜令依舊

敕歲初處分

敕天地以大德生羣品聖人以大寶守萬物古者受命之君謂之承天之序明有所代夫豈徒然若道無欽崇命不永保帝實臨汝人曷戴君朕所以每期庶乎合於仁覆之意也夫宓義神農黃帝堯舜或誅而不怒或教而不誅彼

亦何爲獨臻於此朕自有天下二紀及茲雖未能晝衣以禁亦未嘗刑人於市而政猶踳駁俗尚澆漓當是爲理之心未返於本耳凡人豈不仁於父母兄弟不欲於飲食衣服乎而卒被無孝友之名不溫飽之困其故何哉蓋未聞義方不識善道或任小智而爲詐或見小利而苟得致遠則窮繼之以暴已而身受戮誅家不相保愚妄之徒類多自陷訟獄之弊恆由此作吁可悲乎亦在教之不明也蓋刑罰者不獲已而用之天下黔黎皆朕赤子以誠告示其或知歸何必用威然後致理先務仁恕寧不懷之且五常

循行豈須深識六親和睦何待丁寧自宜勉之以副所望  
刑措不用道在於茲今獻歲之吉迎氣伊始敬順天常無  
違月令所由長吏可舉舊章諸有嫗伏孕育之物蠢動生  
植之類慎無殺伐致今天傷九土異宜三農在候聚眾興  
役妨時害功特宜禁止以助春事至若家有征鎮人或孤  
惻物向陽和此獨憂悴良可憫也亦宜所由隨事優恤蓋  
不體仁無以爲長不知道無以用心故道者眾妙之門而  
心者萬事之統得其要會義可以兼濟於人失其指歸生  
不能自全於已故我元元皇帝著道德經五千文明乎真

宗致於妙用而有位者未之講習不務清淨欲令所爲之政教何從而致於太和者耶百辟卿士各須詳讀勉存進道之誠更圖前席之議至如計校小利綜緝煩文邀名直行去道彌遠違天和氣生人怨心朕甚厭之所不取也各勵精一共興元化俾蒼生登於仁壽天下還於淳樸豈遠乎哉行之可至其老子道德經宜令士庶家藏一本仍勸習讀使知指要每年貢舉人量減尚書論語一兩道策準數加老子策俾敦崇道本附益化源朕推誠與人有此教誠必驗行事豈垂空言今之此教亦宜家置一本每須三

省以識朕懷

敕處分舉人

敕求賢濟理詢事考言務取由衷以觀淑識頃年策試頗成弊風所問既不切於時宜所對亦何關於政事徒徵隱僻莫見才明以此擇賢良未得所卿等各膺推薦副朕虛求宜其悉心各盡所見勿復仍舊空載游詞各宜就食食訖就試

敕處分縣令

敕諸縣令等自古致理其在命官今之所切莫如守宰朕

每屬意九重此官有善者雖遠必升無能者縱近必廢惟  
取才實非務官資事亦坦然天下所見而浮競之輩未識  
朕懷俾其宰邑便爲棄地或以煩碎而不專意或以僻遠  
而不畏法或以徇已而貪婪或以畏法而巽懦浸染成俗  
妨奪爲常嗷嗷下人於何寄命朕所以寢興軫念思以濟  
人故命吏曹精選才幹卿等各膺推擇用簡朕心若能理  
化有聲名實相副必有超擢終不食言如其謂人不知惟  
利是視自速負敗兩喪身名智者所圖應不至是各宜勉  
勵以副勤屬

敕處分縣令

敕新除河南府密縣令張稷等令長之任黎庶尤切比嘗  
選舉未盡得人然而勇進之流乃非其好矯弊之政豈無  
所革令旣各膺獎用當盡良能期月有成聲能若著所列  
清要惟待賢才旣爾有聞不患無位各宜勉勵以副朕心

敕處分選人

敕朕憫茲下人不忘寤寐庶乎富教寄在牧宰所以推擇  
才能親加考覈卿等各膺時用副朕虛求亦旣得人佇聞  
佳政若能銳精爲理聲績有稱卽當待以不次信斯言之



可復如其政不能舉行且有遺豈獨敗於厥躬必將坐於  
舉主此亦明約不得不然各宜勉之以成名節今賜卿少  
物各宜領取並於朝堂坐食食訖好去

敕議放私鑄錢

敕布帛不可以尺寸爲交易菽粟不可以杪勺貿有無故  
古之爲錢將以通貨幣蓋人所作非天寶生頃者耕織爲  
資乃稍賤而傷本磨鑄之物却以少而致貴頃雖官鑄所  
入無幾約工計本勞費又多公私之間給用不贍永言其  
弊豈無變通往者漢文之時已有放鑄之令雖見非於賈

誼亦無費於賢君況古往今來時異事變反經之事安有  
定耶終然固拘必無足用且欲不禁私鑄其理如何公卿  
百僚詳議可否朕將親覽擇善而從

敕處分宴朔方將士

敕朔方軍節度大使兵部尚書信安郡王禕總戎朔陞經  
略萬里賦車籍馬精卒銳兵自其有虞莫不素練而醜虜  
背誕偏師致誅謀若有神取如俯拾雖廟略之云遠亦將  
士之力焉威武載揚頑凶且懾狂寇覆巢以奔北羣師掉  
鞅而來歸因其凱旋聊加宴樂各宜坐食相與盡歡其軍

將已下官賞別有處分信安郡王祿與一子官

敕宴幽州老人

敕幽州老人師知禮等比者林胡翻覆薦歲不寧戎馬之鄉良亦深苦而賊虜自叛天實誘之主將致誅略無遺噍實除邊患且減征徭卿等忠義因心遠來陳賀深所嘉尚並宜坐食各有賜物食訖領取

敕慮囚

敕時向炎蒸人或冤繫豈忘仁恕固須審察其京都城見禁囚宜令中書門下及留守檢覆訖徒已下罪各諉所由

長官據情狀量決罰便放死罪已下遞降一等有情狀難容合決格杖者決訖準例處分天下諸州亦並準此

敕擇日告廟

敕邊境爲患莫甚於林胡朝廷是虞幾煩於將帥車徒屢出芻粟載勞使燕趙黎氓略無寧歲而山戎種落常爲匪人近有野心窮而歸我曾是懷附每所撫柔而不變鴟音輒爲獸搏幽州節度使副大使張守珪等乘閒電發表裏奮討積年逋逃一朝翦滅則東北之祲便以廓清河朔之人差寬征戍此皆上憑九廟之略下仗羣帥之功今其凱

旋敢不以獻宜擇吉日告九廟所司準式

敕辭泰書

敕辭泰朕撫育降奚每事過厚衣食供給數年於茲而禽獸無知不懷恩信相率種落一時叛亡此於國家譬猶蚊蚋耳無所憚惜惟惡惡心總是亂階私相招誘若不撲滅何以示威卿可率所統與紀思誨王忠嗣等計會進討卿既身在邊鎮深練兵權進退動靜惟變所適敵則預料奇出臨時會在審量不可輕舉氣候漸暖卿及將士已下並得如宜遣書指不多及

敕安西節度王斛斯書

敕安西副大都護王斛斯使人兼趙璧近至省表具之前  
已敕卿嚴加部勒近得奏請皆依處置卿當此信任必用  
盡誠蕃鎮之虞且無西顧頃者劉渙凶悖遂起姦謀朕以  
偏荒比加隱忍而惡跡轉露人神不容忠義之徒復知密  
旨自聞伏法自取誅夷狂愚至深亦何足道卿與彼地近  
想備知之突騎施北來窺隙會須審察至竟如何蕃中人  
來未可輕信但當撫養士卒而臨事制宜必先保全以此  
爲上夏初已熱卿及將士已下平安好遣書指不多及

敕西州都督張待賓書

敕西州都督張待賓累得卿表一一具知劉渙凶狂自取  
誅滅遠近聞者莫不慶快卿誠深疾惡初屢表聞邊事動  
靜皆爾用意卽朕無憂也夏初漸熱卿及將士官僚百姓  
已下並平安好遣書指不多及

敕清夷軍使虞靈章書

敕清夷軍使虞靈章窮寇傷殘寄命無所猶以遺噍敢犯  
塞垣卿義勇過人臨難無苟親當矢石逐此犬羊略有梟  
夷足申威武邊寄盡節朕甚嘉之仍聞鋒鏑旣交在卿亦

有所損神道助順應不爲災今將藥物可以時療所有將士用命卽具狀以聞其不幸陣亡固將滾悼惜亦宜追卹當有加贈夏末甚熱卿及將士已下並平安好遣書指不多及

敕伊吾軍使張楚賓書

敕伊州刺史伊吾軍使張楚賓近得卿表知沙陁入界此爲劉渙凶逆處置狂疎遂令此蕃暫有遷轉今劉渙伏法遠近知之計沙陁部落當自歸本處卿可具宣朝旨以慰其心兼與蓋嘉運相知取其穩便豐草美水皆在北庭計



必思歸從其所欲也卿可量事安慰仍勿催迫處置了日具以狀聞夏中盛熱卿及將士百姓已下並平安好遣書指不多及

敕河西節度牛仙客書

敕河西節度使牛仙客邊事煩總苦已勞神若不纖悉安得條理頃聞訓練士馬蓄積軍儲資用有餘動不忘備是卿忠烈更勤經略事事如此朕復何憂摩管之聞想皆得所卿近有奏請並已處分夏末甚熱卿及將士百姓已下並平安好遣書指不多及

敕北庭將士已下書

敕北庭將士瀚海軍使蓋嘉運已下逆胡忿戾乘此猖狂  
驅率匪人圍犯邊鎮皆如素慮不出下策卿等雖在絕境  
且據堅城將士一心莫非義勇觀釁而動取亂在茲宜臨  
事籌之無失此便但蘇祿本以姦詐誑誘羣胡無德在人  
何能有國今乃驅烏合之眾作不義之舉師曲在老族滅  
其時卿可因其不固之心乘其已疲之眾犄角歸路翦滅  
逋醜此亦天與豈直人謀仍熟料之取萬全也國之重賞  
惟待奇功豈在言之自良圖耳比秋氣已冷卿及將士百

姓並安好遣書指不多及

敕西州都督張待賓書

敕西州都督張待賓及官吏百姓已下不虞狂賊擁眾多時彼州軍人素乏器械聞其悉力能不懸心卿等堅守孤城敵此凶寇亦既久拒終然萬全斯乃義可感幽鬼神相助妖不勝德氛祲自銷來無所能去無所得犬羊之眾道路埋魂其於破傷亦云甚矣向使甲戈有豫士卒且強躡彼歸途可無噍類卽令所司支料以備後來其有功之人各且據實以時敘定當有酬賞其龍泉寺小堡被其殘破

雖已收拾猶慮損傷各宜宣慰令得存活秋氣已冷卿及  
寮吏百姓已下並平安好今賜卿衣一副至宜領取遣書  
指不多及

敕北庭將士百姓等書

敕北庭將士部落及百姓等忠義所感在臣子而固然凶  
惡必誅雖鬼神而亦爾逆賊劉渙不意含氣有此狂愚忽  
於夷塗坐生逆節姦謀雖起狡數自窮誘人不從欺天斯  
甚由是忠義奮發凶醜就擒雖則奴庸何足比數然則荒  
徼亦云除惡皆是卿等同心盡力向國輸忠能協人鬼之

金史卷之二十一  
三  
謀不貽戎狄之笑朕每以嘉歎無忘於心所云有功皆已  
優賞懲惡勸善實在於茲夏中甚熱卿並平安好遣書指  
不多及

敕新羅王金重熙書

敕新羅王金重熙金獻章及僧沖虛等至省表兼進獻及  
進功德並陳謝者具悉卿一方貴族累葉雄材秉忠孝以  
立身資信義而爲國代承爵命日慕華風師旅叶和邊疆  
寧泰況又時修職貢歲奉表章進獻精珍忠勤並至功德  
成就恭敬彌彰載覽謝陳並用嘉歎滄波萬里雖隔於海

隅丹悃一心每馳於闕下以茲歎賞常屬寢興勉宏始終  
用副朕意今遣金獻章等歸國並少有信物具在別錄卿  
母及妃並副王宰相以下各有賜物至宜領之冬寒卿比  
平安好卿母比得如宜官吏將士百姓僧道等各家存問  
遣書指不多及

敕新羅王金興光書

敕新羅王開府儀同三司使持節大都督雞林州諸軍事  
上柱國金興光賀正使金碣丹等至兼得所進物省表具  
之海路艱阻朝賀不闕歲亦忠謹日以嗟稱所謂君子爲

邦動必由禮頃者渤海靺鞨不識恩信負恃荒遠且爾逋誅卿嫉惡之情常以奮勵故去年遣中使同行成與金思蘭同往欲以叶謀比聞此賊困窮偷生海曲唯以抄竊作梗道路卿當隨近伺隙掩襲取之奇功若有所成重賞更何所愛適欲多有寄附實慮此賊抄奪不可不防豈資窮寇待蕩滅之後終無所惜一昨金志廉等到緣事緒未及還期忽嬰瘵疾遽令救療而不幸殂逝相次數人言念殊鄉載淡軫悼想卿聞此良以增懷然死者生之常固其命也固當理遣無以累情初秋尚熱卿及首領百姓已下並

平安好今有答信物及別寄少信物並付金信忠往至宜領取遣書指不多及

敕河西節度牛仙客書

敕河西節度使牛仙客戎狄無義禽獸不若但當以兵威取此豈可人道論之突騎施頃者通和朕每撫之如子行李往來不隔歲時賜與優饒非直君長而窺我邊隙圖陷庭州關侯斤所以見誅天下孰云不當不思已過仍敢我讎率其犬羊犯我皇堡是其送死之日可謂天亡之時若不因其自來乘危決策一失此便後悔何追宜密令安西



徵蕃漢兵一萬人仍使人星夜倍道與大食計會取葉護  
敕達等路入碎葉令王斛斯自領精騎取其家口河西節  
度內發蕃漢二萬人取瓜州比高同伯帳路西入仍委卿  
簡擇騎將統率仍先與西庭等計會尅日齊入比已敕朔  
方軍西受降城定遠城及靈州兼取大家子弟並豐安新  
泉等軍共徵二萬於瓜州北庭招託就中簡擇驍健五千  
人先入直赴北庭從瓜州宜給一月熟糧若至北庭糧貯  
可支五年以上凡此諸道徵發並限十二月上旬齊集西  
庭等州一時討襲時不可失兵貴從權破虜滅胡必在此

舉卿可火急支計無失便宜今故使內侍程元宗催遣兵馬一一口具秋氣漸冷卿及將士百姓已下並平安好遣書指不多及

敕瀚海軍使蓋嘉運書

敕瀚海軍使北庭都護蓋嘉運及將吏軍士百姓已下蘇祿反虜敢爲寇讎犯我邊城初聞蟻附投兵死地果自冰銷朕始料之一不差也近得卿表知其狼狽而賊旣不利眾必攜離犯順違天招殃破國將在此舉已見其徵卿等堅守孤城赤心邊徼言念及此嗟尚久之初解重圍差有

勞苦將士已下並得如宐又卿表所云葉護被殺事勢合爾殆非妄傳向若安西出兵乘虛討襲碎葉逆醜皆可成擒應爲懸軍未能越境逆虜漏刃莫不由茲今賊雖請和恃我張勢以防大食之下以鎮雜虜之心豈是眞情此其姦數卿可與王斛斯計會向其動靜因利乘便取亂侮亡不以此時知待何日儻成功立業重賞高班信若四時固必然也近者所有效功一皆委卿甄錄各據實狀具以名聞初冬漸寒卿及將吏軍士百姓並平安好遣書指不多及

敕安西節度王斛斯書

敕王斛斯得卿表知諸將接勇亦有克捷是卿指麾獲此  
凶醜蘇祿背德敢茲寇讎自斃犬馬之羣我無毫釐之失  
聞其狼狽疲羸滿道乘此翦撲勢若摧枯張義之等雖各  
行誅猶恨其少古之善用兵者不必在眾能制敵者會在  
出奇狂賊此來真亦送死眾既不整心且非一烏雜之虜  
持久氣衰向有奇決破之必矣且如所奏亦足申威其將  
士立功擒殺有狀各據實聞奏當加優賞頃來諸軍奏請  
所患在於不實將既虛敘人則妄求如此相蒙自然撓法

朕以信示下以賞勸勞豈於其閒亦容有詭故委卿在遠所寄則浹必取誠實勿令致此冬初已冷卿等及將士以下並平安好遣書指不多及

敕幽州節度張守珪書

敕幽州節度副大使兼御史中丞張守珪漁陽平盧東北重鎮匈奴斷臂山戎扼喉節制之權莫不在此朕所以雅仗才識誠思遠圖旣膺此舉當成本志今奚賊殘破固不足言契丹餘孽猶且爲梗將遂掃蕩懸賞須明至如寇抄之來邊境常事苟非大敵不勞我師頃者偏小邀功或亦

附益其事言而不實示信何歸賞而有虛敘勞何勸適使  
貪嗜小利之輩不思翦滅大舉之策則濫謀重賞更待何  
人而革弊成功當在卿爾其有賊非天下因有擒馘灼然  
殊效者可量事奏聞其餘微勞並任軍中賞賜冀能自勉  
今有後圖若信其苟爲終若成事而綱紀不立夷狄笑人  
以卿之明固在目擊也秋氣已冷卿及將吏以下並平安  
好遣書指不多及

敕幽州節度張守珪書

敕張守珪安祿山兩蕃自昔輔車相依奚旣破傷殆無遺

噍契丹孤弱何能自全復聞突厥徵求欲有逃避傳者縱其未實此虜終已合然藉卿運籌徐以計取況祿山義勇武藝絕人謀帥得賢裨將復爾以討殘賊勢若摧枯仗順而行何敵之有今者又云遇賊略有芟夷乘其數窮日向殲盡其灼然有功效者可具以狀聞會取實勞以當優賞趙堪云卿見部勒欲以師行兵貴從權以時經略在卿臨事一以委之效命輸忠成名立事居今慕古千載一時衛霍之儔獨何人也邊事煩總無乃爲勞冬初薄寒卿及祿山並諸將士已下並平安好遣書指不多及

敕劍南節度王昱書

敕劍南節度副大使兼採訪使益州長史攝御史中丞王  
昱蠻夷相攻中國大利自古如此卿所知之然吐蕃請和  
近與結約羣蠻翻附彼將有詞卿可審籌其宜就中處置  
使蠻落不失望吐蕃又無憾詞柔遠懷來在卿良算所請  
入奏豈欲固違屬諸蠻初降正有邊要馳傳以入不日遄  
歸來去不遑迨爲勞力卿當此重寄每竭公忠言念遠情  
當亦想見義非獲已來歲何遲冬初薄寒卿比平安好遣  
書指不多及



欽定全唐文卷二百八十五目錄

張九齡 三

敕投降奚等書

敕契丹王據埒可突于等書

敕契丹都督泥禮書

敕幽州節度張守珪書

敕奚都督李歸國書

敕奚都督李歸國書

敕平盧使烏知義書

敕松漠都督泥禮書

敕幽州節度張守珪書

敕幽州節度張守珪書

敕幽州節度張守珪書

敕幽州節度張守珪書

敕幽州節度張守珪書

敕平盧使烏知義書

敕平盧諸將士書

敕新羅王金興光書

敕新羅王金興光書

敕渤海王大武藝書

敕渤海王大武藝書

敕渤海王大武藝書

敕渤海王大武藝書

敕平盧使烏知義書

敕河東節度副使王忠嗣書

敕當州別駕董徽運書

敕當悉等州羌首領書

敕嶺州都督許齊物書

敕隴右節度陰承本書

敕北庭經略使蓋嘉運書

敕安西節度王斛斯書

敕安西節度王斛斯書

敕安西節度王斛斯書

敕安西節度王斛斯書

欽定全唐文卷二百八十五

張九齡三

敕投降奚等書

敕新來投降奚等汝本小蕃不自存立頃年依我稍得安  
全而常持兩端遽卽背叛忘恩負義豈是人心今者聞汝  
復歸亦應知過仍緣困蹙未免嫌疑汝若誠能洗心永以  
寄命便令處置汝等當須一一聽從卽捨往愆更期來效  
官賞諸事皆如舊日各宜自勉勿不知恩比嚴寒汝等部  
落百姓並平安好遣書指不多及

敕契丹王據埽可突于等書

敕契丹王據埽及衙官可突于蜀活刺史鬱捷等順道則  
吉惟智能圖逆節卽凶豈愚所覺如卿頃年背誕實養禍  
胎今而知之亦猶未晚因是轉災爲福因敗而成去百死  
之危保萬全之計則昔者之去何其悖也今茲復來又何  
智也皆是卿素有籌略本於忠誠率先種人拔於死地自  
爾之後更有何憂朕於諸蕃未嘗負約況於卿等更有舊  
恩聞卿此來豁然慰意一則兵革都息二則君臣如初百  
姓之閒不失耕種豐草美水畜牧隨之更無外虞且知上

策人生自奉誰不求安休此永年一無他慮在卿所見何  
假朕言部落初歸應須安置可與守珪審定務依蕃部所  
欲想其沃饒之所適彼寒暑之便無令下人有所不愜也  
冬末寒甚卿與衙官軍吏刺史已下及部落百姓並平安  
好遣書指不多及

敕契丹都督泥禮書

敕契丹都督泥禮往者屈烈突于凶惡無心憂矜百姓背  
叛於我終日自防丁壯不得耕耘牛馬不得生養及依附  
突厥而課稅又多部落吁嗟卿所見也李過折因眾人之

忿誅頑凶之徒諸部酋豪相率歸我已令隨事賞賜亦云  
且得安寧過折封王豈直賞功而已亦爲百姓眾意賴其  
撫存不知近日已來若爲非理亦聞殺害無罪棒打又多  
眾情不安遂致非命然卿彼之蕃法多無義於君長自昔  
如此朕亦知之然是卿蕃王有惡徑殺爲此王者不亦難  
乎但恐卿今爲王後人亦常不自保誰願作王卿雖蕃人  
是當土豪傑亦須防慮後事宜取快志目前過折旣亡卿  
初知都督百姓諸處分復得安寧以否張守珪先擬往彼  
亦卽令便就處置卿應有官賞卽有處分夏中甚熱卿及



首領百姓並平安好今賜卿錦衣一副並細腰帶七事至  
宜領取遣書指不多及

敕幽州節度張守珪書

敕幽州節度副大使兼御史大夫張守珪近有降人云虜  
騎東下其數稍眾固宜有以待之仍聞兩蕃亦有應接當  
是妄語終須審觀若保無他便可信任也至於兵馬權略  
決在一時卿自審量不可懸料然虜騎馳突難與爭鋒會  
是乘其氣衰然後邀擊一戰取滅或在此舉頃者泥禮自  
擅雖以義責而未有名位恐其不安卿可宣示朝旨使知

無他也並便處置訖奏聞朕當卽有處分比秋熱卿及將士已下並平安好今令趙惠琮一一口具遣書指不多及

敕奚都督李歸國書

敕李歸國近得守珪表稱奚衙官耨雲輒構異謀攜閒部落兼藏突厥仍欲圖卿知卿忠義一心糾逖無隱臨危制變果獲罪人此雖天誘其衷亦是卿誠效克著聞已誅翦是自滅亡朕於諸蕃含養過厚忝預人類亦合知恩但百姓無識易爲驚擾安危動靜處之在人以卿才能自應率伏念加威惠勿使猜嫌旣去亂羣當已寧帖所設官賞惟

待有功苟能盡節何憂不賞各宜勉勵以副朕懷秋涼卿及衙官已下並平安好遣書指不多及

敕奚都督李歸國書

敕奚都督右金吾衛大將軍歸誠王李歸國朕比聞突厥欲滅卿兩蕃先敕守珪嚴爲防護今聞泥禮已破凶徒仍慮其收合餘燼復來掩襲卿可與泥禮相爲腹背但突厥不盡後患終深卿可伺其歸師乘其喪氣與諸將計會逐要追襲時不可失宜自思之秋深極冷卿及衙官將士已下並平安好遣書指不多及

金史卷一百一十五  
卷一百一十五  
四  
敕平盧使烏知義書

敕烏知義兩蕃旣已歸我突厥仍敢犯邊此其不順誠可  
殘滅適聞契丹及奚等並力合謀同破凶醜卿亦繼進相  
與成功此之一捷使其喪氣然關防困獸誘備羸師兵家  
之難慎在終始卿是宿將當自明之若見可則行務須靈  
敏固在臨事難用速言必圖萬全不可輕舉已敕守珪與  
卿計會可須觀釁裁之秋涼卿及將士已下並平安好遣  
書指不多及

敕松漠都督泥禮書

敕松漠都督右金吾衛大將軍泥禮得張守珪表知卿等  
破賊且突厥此來也其心毒害又甚輕敵人事之與神道  
可得有不有傷殘卿之忠誠加以義勇以順討逆自然必勝  
朕所懸爵秩惟賞有功況卿赤心復加戎捷然狂賊自遠  
投於死地今其傷敗必更有謀可須防之重不可失烏知  
義在彼宜與臨事籌之若須邀截亦與之計會秋氣漸涼  
卿及衙官首領百姓並平安好遣書指不多及

敕幽州節度張守珪書

敕幽州節度副大使幽州長史兼御史大夫張守珪北虜

猖狂勞師遠襲朕已成料知其破傷得卿上言果如前策  
然契丹恃我其心不攜以逸待勞取之必也既有尅捷當  
更防之困獸猶鬪窮寇勿遏喪敗之餘其氣不振乘此不  
取後悔難追熟料萬全然後邀擊蕃漢相雜使其莫辨此  
亦便不可失時不再來臨事指麾在卿審斷也事今若此  
得算已多勿復怱怱致難於末路卿比疝疾今復何似宜  
善將療不得自勤秋涼卿將士已下並平安好遣書指不  
多及

敕幽州節度張守珪書

敕幽州節度副大使張守珪趙堪至一一具知以國家之  
威武取敗亡之殘孽泰山壓卵豈其難乎頃者緣卿入朝  
節制斲闕二虜乘隙相繼叛亡裨將無謀輕兵遣襲遂有  
輸失挫我銳氣此故猶細彼禍更深卿可秣馬訓兵候時  
而動草衰木落其則不遠近者所徵萬人不日卽令進發  
大集之後諸道齊驅叢爾凶徒何足殲盡平盧信息日夕  
往來數與籌筮首尾相應令彼醜虜飛走無歸事有預圖  
臨時合變想卿所悉不煩具言所有奏請並已處分訖夏  
末極熱卿及將士已下並平安好遣書指不多及

敕幽州節度張守珪書

敕幽州節度副大使張守珪張奉高下叛奚自取殲滅此等惡積天將絕種故遽誘其衷叛亡相繼及師徒追下皆就誅夷一二年間凶黨必盡亦由卿指揮得所動不失宜明於兵權暗合神道故能致此也安祿山楊景暉湔雪前恥亦云效命鋒鏑之下各致損傷言念忠誠豈妄加獎已別有處分訖將士陣亡各須弔祭應合贈飾亦已狀聞聚兵饋糧義不可久秋深木落規略自宜機謀未豫何以除惡永久爲患將若之何委卿良圖用息邊甲彼軍少馬已



敕朔方想卿早知之宜差人受領秋氣漸冷卿及將士已下並平安好遣書指不多及

敕幽州節度張守珪書

敕幽州節度副大使張守珪頃者慰撫降虜每事優給而終不知恩惟圖反噬名雖人類實甚豺狼今所叛亡何苦如此近者聞其家累多並爲我所得惟有丁壯挺身走險樹木旣闔弓矢亦全以窮寇失家之心乘深林必死之地若冒此輕進豈云料敵安祿山勇而無謀遂至失利衣甲資盜挫我軍威論其輕敵合加重罪然卽初聞勇鬪亦有

金史卷之三  
卷之三  
誅殺又寇戎未滅軍令從權故不以一敗棄之將欲收其  
後效也不行薄責又無所懲宜且停舊官令白衣將領卿  
更審量本狀亦任隨事處之所將陣亡之人及戰傷之者  
並收瘞救療弔死問生寇讐之來豈其獲已言念於此良  
深嗟悼卿等各秉忠義式遏方隅躬冒險難寧不知此無  
以小失致奪軍氣數宜激勵以保功名平盧軍儲取能支  
久若賊口聚食費耗更多早宜處置使得所也今將金瘡  
藥寄至可分療將士並數令巡問春後漸熱卿及將士並  
平安好遣書指不多及

敕幽州節度張守珪書

敕幽州節度副大使張守珪昨史思明往已有處分趙堪  
適至委曲知之安祿山等輕我兵威曾不審料致今損失  
宜其就誅卿旣行軍於法合爾然此賊初叛勢尚未合乘  
其虛弱正可追擒直爲林閭山濊恃不存之地萬一獸駭  
致損更多以此思之固須且守伺其有隙乘便翦除如此  
籌宜應是長策且戰者凶事有勝有負無以邂逅遂至蒼  
黃使我驍雄小有奪氣負罪者旣其卽戮用命者亦宜昇  
獎彼之小醜何足可除所有奏入卽當處分平盧以北動

靜須知得其委曲隨事防備委卿在遠一一必由但量宜行之奏未晚也

敕平盧使烏知義書

敕平盧使烏知義委卿重鎮安輯兩蕃動靜須知節制斯在而二虜將叛來往有謀曾不是思信其至此又委安祿山輕突挫我軍威不嚴其約是事無豫一朝損失雖悔何追但以卿忠勤復是耆舊雖有過失一切不論實欲盡卿所長收其後效固須易慮以補前闕此賊既叛意其却攻每事須防無失便也一一並趙堪口具夏初漸熱卿及將

士並平安好遣書指不多及

敕平盧諸將士書

敕平盧諸軍鎮將士已下兩蕃殘賊餘類僅存朕嘗懷撫柔冀其遷善而數年之內謀叛相仍信是梟鴟固非人也頃者所以列置軍鎮遞爲唇齒所虞在此豈欲勞人卿等委身邊疆爲國展效遇其反噬得不計除近日安祿山無謀率爾輕敵馳突不顧遂損師徒擇將不良傷人已甚事雖旣往義實疚懷凡在平盧其陣亡之人並委張守珪差人弔祭並勘實鄉貫具以狀聞憫彼傷魂當有贈飾興言

悼惜久不能忘然此賊比來削弱已甚按繩繫頸人有其心安祿山之敗緣輕敵太過勿因此畏懦致失後圖立功成名榮貴斯在各宜勉勵共除凶惡夏初漸熱卿等並平安好遣書指不多及

敕新羅王金興光書

敕鷄林州大都督新羅王金興光比歲使來朝貢相繼雖隔滄海無異諸華禮樂衣冠亦在此矣皆是卿率心忠義能此恭勤朕每嘉之常優等數想卿在遠應體至懷頃者彼處使來累有物故水土不習飲食異宜奄忽爲災遂至

不救言念逝者此其命乎想卿乍聞應以傷悼所以表奏  
皆依來請夏初漸熱卿及吏人並平安好今有少物並付  
來使至宜領取遣書指不多及

敕新羅王金興光書

敕雞林州大都督新羅王金興光賀正謝恩兩使續至再  
省來表深具雅懷卿位總一方道踰萬里託誠見於章奏  
執禮存乎使臣雖隔滄溟亦如面會卿旣能副朕虛已朕  
亦保卿一心言念懇誠每以嗟尚況文章禮樂粲焉可觀  
德義簪裾浸以成俗自非才包時傑志合本朝豈得物土

異宐而風流一變乃比卿於魯衛豈復同於蕃服朕之此  
懷想所知也賀正使金義質及祖榮相次永逝念其遠勞  
情以傷憫雖有寵贈猶不能忘想卿乍聞當甚軫悼近又  
得思蘭表稱知卿欲於沮江寘戍旣當渤海衝要又與祿  
山相望仍有遠圖固是長策且蕞爾渤海久已逋誅重勞  
師徒未能撲滅卿每疾惡濊用嘉之警寇安邊有何不可  
處置訖因使以聞今有少物答卿厚意至宐領取春暮已  
暄卿及首領百姓並安好遣書指不多及

敕渤海王大武藝書



敕忽汗州刺史渤海郡王大武藝卿於昆弟之間自相忿  
鬪門藝窮而歸我安得不容然處之西陲爲卿之故亦云  
不失頗謂得所何則卿地雖海曲常習華風至如兄友弟  
悌豈待訓習骨肉情深自所不忍門藝縱有過惡亦合容  
其改修卿遂請取東歸擬肆屠戮朕教天下以孝友豈復  
忍聞此事誠惜卿名行豈是保護逃亡卿不知國恩遂爾  
背德卿所恃者遠非能有他朕比年含容優恤中土所未  
命將事亦有時卿能悔過輸誠轉禍爲福言則似順意尚  
執迷請殺門藝然後歸國是何言也觀卿表狀亦有忠誠

可熟思之不容易爾今使內使往宣諭朕意一一並口具  
述使人李盡彥朕亦親有處分皆所知之秋冷卿及衙官  
首領百姓平安好並遣崔尋挹同往書指不多及

敕渤海王大武藝書

敕渤海郡王忽汗州都督大武藝不識逆順之端不知存  
亡之兆而能有國者未之聞也卿往年背德已爲禍階近  
能悔過不失臣節迷復非遠善又何加朕記人之長忘人  
之短況此歸伏載用嘉歎永祚東土不亦宜乎所令大成  
慶等入朝並已處分各加官賞想具知之所請替人亦令

還彼又近得卿表云突厥遣使求合擬打兩蕃奚及契丹  
今既內屬而突厥私恨欲讎此蕃卿但不從何妨有使擬  
行執縛義所不然此是人情況爲君道然則知卿忠赤動  
必以聞永保此誠慶流未已春晚卿及衙官百姓並平安  
好遣書指不多及

敕渤海王大武藝書

敕渤海郡王忽汗州都督大武藝多蒙固所送水手及承  
前沒落人等來表卿輸誠無所不盡長能保此永作邊捍  
自求多福無以復加漸冷卿及衙官百姓已下並平安好

遣書指不多及

敕渤海王大武藝書

敕忽汗州刺史渤海郡王大武藝卿往者誤計幾於禍成而失道未遙聞義能徙何其智也朕棄人之過收物之誠表卿洗心良以慰意計卿既盡誠節永固東藩子孫百代復何憂也近使至具知款曲兼請宿衛及替亦已依行大朗雅等先犯國章竄逐南鄙亦皆捨罪仍放歸蕃卿可知之皆朕意也夏初漸熱卿及首領百姓等並平安好遣書指不多及

敕平盧使烏知義書

敕平盧節度營州都督烏知義突厥去歲東侵已大不利  
志在報復行必再來契丹及奚一心歸我不有將護豈云  
王略頃有沒蕃人出云其見擬東行蕃漢諸軍須有嚴備  
遠加斥堠動靜須知縱有凶徒亦卽無慮委卿在遠實謂  
得人朕固無憂一任量事渤海黑水近復歸國亦委卿節  
度想所知之春初尚寒卿將士已下並平安好今令白真  
陀羅往亦賜卿衣一副至宜領取遣書指不多及

敕河東節度副使王忠嗣書

敕河東節度副使兼代州都督王忠嗣及諸將士等大叔承慶至知卿遠經賊境晝夜勤勞雖不遇凶徒亦備盡誠效頃屬時暑士馬遠來行李之閒固應疲頓諸軍將等各須撫養令其寧息行迴之人當有宴勞宜令大同軍卽辦宴設及時慰勉夏中極熱卿及將士已下並平安好遣書指不多及

敕當州別駕董徽運書

敕當州別駕董徽運省所奏王昱及嚴正誨表具知所緣卿父往在當州連年縱酒旣加風疾行事乖疎董念封經

使具論王昱始奏停廢皆憑實狀不是冤誣後自病亡豈  
可怨訴所言不直欲信無憑卿久襲冠帶復拘法式寧不  
知此猶且有詞至於卿身合承刺史比來未授亦則有由  
聞卿少年未閑撫字舉州之眾又藉綏懷若蕃部不安豈  
虛此位卿若能自勵從此改修父亡子及終不失舊卿表  
云部落據險幾許無知亦慮惡人因此扇誘幸無他故勿  
取破亡今故令內使往問部落及百姓等此事虛實還自  
具名狀聞比極暄卿及部落百姓並平安好遣書指不多  
及

敕當悉等州羌首領書

敕當悉柘靜維翼等諸州首領百姓等前者令王承訓往宣問事止當州比其却來云諸州亦有所望州縣一也恩豈不均卿等祖父已來爲國守境皆盡忠赤防捍外蕃朝廷嘉之官賞相繼近者處置未當又得卿表所論朕皆依行想皆遂願今聞吐蕃屯結近在安戎比來通和未有淺隙計其不合爲寇未知何故起兵卿比臨邊各須伺候慮有侵軼損我居人若預圖之保無憂也其董懲運董嘉宗已有處分訖其董念雙羌嘉弄等亦卽續有處分必須



嚴勒蕃部豫備惡人寇讐縱來計無所得我之策豈不  
在茲卿等榮貴勿憂不遂今故令王承訓重宣往意比已  
熱首領百姓等並平安好遣書指不多及

敕嵩州都督許齊物書

敕許齊物近者投降吐蕃云蕃兵已向南取鹽井比已敕  
達奚守珪蒙歸義訖卿可嚴備勿失事宜應須防守並委  
量事處分仍遠著斥堠知其有無有則從權無則仍舊慎  
勿生事騷擾邊人秋中漸涼卿及吏人已下並平安好遣  
書指不多及

敕隴右節度陰承本書

敕隴右節度使陰承本使人范正顏至省表具知朕於吐蕃恩信不失彼心有異操持兩端陰結突騎施密相來往事既醜露却以怨尤乃云姚儒用兵取其城堡略觀此意必欲爲惡必不得先舉但須嚴備遠加斥堠察其動靜若形兆已見馳狀以聞諸處軍城數加戒敕若不稱職速須改換今年交兵新到隴右未經戎事大須訓習在彼處置委卿裁之雖有邊虞固無憂也秋初尚熱卿及將士並平安好遣書指不多及

敕北庭經略使蓋嘉運書

敕蓋嘉運等安西去年屢有攻戰醜虜肆惡懸軍可憂卿  
深識事宜以時救援先聲旣振後殿載揚凶黨之間卷甲  
而遁使我邊鎮且得休息然此賊爲患勢未必已可數與  
王斛斯計會每事先防彼將自勞眾則離貳我因其隙從  
此可圖善熟籌之勿失便也春晚卿及將士已下並平安  
好遣書指不多及

敕安西節度王斛斯書

敕四鎮節度副大使安西副大都護王斛斯及將士等突

騎施輒凶暴侵我西陲卿等懸軍遇此狂賊爰自去夏以迄於今攻戰相仍念甚勤苦近者聞在撥換兵少賊多朕每憂之慮遭吞噬又聞兵勢漸合將士同心父子之軍亦不在眾犬羊之類復何能爲屢有殺獲固其宜也卿等各負忠勇爲國忘身鋒鏑之閒瘡痍未免或致物故深用哀傷朱仁惠竟致淪亡良可悼惜具有褒贈以慰營魂福流子孫良亦在此其有頻當矢石每戰有功義可成名勇能抗敵或能出奇以挫凶威並具狀以聞卽有優拔自餘戰士盡力邊荒計其積勞又在絕遠至於行賞豈比尋常勉

樹功名卽有官爵且北山雲閒虜眾又疲歸途旣難必有  
攜貳張義之將兵若至河西北庭兵又大集滅胡之舉亦  
在今時可臨事圖之無失便也一勞永逸豈不在茲所奏  
縱賓軌魏蹇等官及前年第一立功人官並依所請訖告  
身卽差使頒送初春尚寒卿及將士已下並平安好遣書  
指不多及

敕安西節度王斛斯書

敕四鎮節度副大使安西副大都護王斛斯等狂賊經冬  
犯邊爲梗將士守備不釋戈甲言念勤苦良深嗟歎旣負

忠義爲國盡誠懦夫所難志士所重感激增氣視死如歸  
古人之言今知之矣又聞此賊尋亦退散攻圍旣解且得  
休息朕雖在九重心懸萬里念慮之至想所知之近旣加  
兵惟憂糧貯諸處屯種今復何如逆賊有謀還慮殘暴必  
須善守無令損失若諸城有糧兵復足用念戾之虜行應  
再來勞眾離心豈能無隙乘此一舉蕩滅有期宜善撫我  
人以待其弊小捷小獲何用此爲春晚極暄卿及將士已  
下並平安好今賜卿衣一副至宜領取遣書指不多及

敕安西節度王斛斯書

敕王斛斯得卿表並大食東面將軍呼邏散訶密表具知  
卿使張舒耀計會兵馬迴此雖遠蕃亦是強國觀其意理  
似存信義若四月出兵是實卿彼已合知之還須量意與  
其相應使知此者計會不是空言且突騎施負恩爲天所  
棄訶密若能助國破此寇讎錄其遠勞卽合優賞但未知  
事實不可虛行卿可觀察蕃情頗有定否卽須隨事慰接  
令彼知之若舒耀等虛有報章未得要領豈徒不實當有  
所懲絕域行人不容易也今秋此賊形候何如善須防之  
勿使侵軼時暑卿及將士已下並平安好遣書指不多及

敕安西節度王斛斯書

敕四鎮節度副大使安西副大都護王斛斯及將士已下  
朕雖居九重不忘征戍況強寇壓境侵軼是虞言念勤勞  
良所歎憊卿等各懷忠義不憚荒遐以此彌年足見誠節  
去歲因有狂賊在彼屢有戰亡昨得表言對之愴惻然卿  
狀但言都數其中不列姓名已令勘責可速以實報朕當  
錄其死義贈以官榮使異域之功存亡受賞近日狂虜形  
候如何屯收是時尤須備預更資一熟亦復何憂兼聞吐  
蕃與此賊計會應是要路斥堠須明事必預知動卽無患



耳夏晚毒熱卿及將士已下並平安好遣書指不多及